

BAB

7

PERLINDUNGAN
HARTA INTELEK

REGISTER

LAW


PROPERTY

COPYRIGHT

IDEA

LICENSE

PATENT



1. PERLINDUNGAN HARTA INTELEK

- 1.1 Paten
- 1.2 Cap Dagangan
- 1.3 Reka Bentuk Perindustrian
- 1.4 Hak Cipta
- 1.5 Reka Bentuk Susur Atur Litar Bersepadu
- 1.6 Petunjuk Geografi
- 1.7 Penilaian Harta Intelek
- 1.8 Pembiayaan IP
- 1.9 Pasaran Hak IP



PERLINDUNGAN HARTA INTELEK

1. PERLINDUNGAN HARTA INTELEK

Sistem harta intelek di Malaysia ditadbir oleh Perbadanan Harta Intelek Malaysia (MyIPO), sebuah agensi di bawah Kementerian Perdagangan Dalam Negeri dan Hal Ehwal Pengguna. Perlindungan harta intelek di Malaysia terdiri daripada paten, cap dagangan, reka bentuk perindustrian, hak cipta, petunjuk geografi dan reka bentuk susur atur litar bersepadu. Malaysia merupakan anggota Pertubuhan Harta Intelek Sedunia (WIPO) dan penandatanganan Konvensyen Paris dan Konvensyen Berne yang mengawal hak harta intelek ini.

Di samping itu, Malaysia juga merupakan penandatanganan Perjanjian mengenai Aspek Berkaitan Hak-hak Harta Intelek (TRIPS) yang ditandatangani di bawah naungan Pertubuhan Perdagangan Dunia (WTO). Malaysia menyediakan perlindungan yang secukupnya kepada pelabur tempatan dan asing. Undang-undang harta intelek Malaysia adalah selaras dengan piawaian antarabangsa dan telah dikaji semula oleh Majlis TRIPS secara berkala.

1.1 Paten

Akta Paten 1983 dan Peraturan-Peraturan Paten 1986 mengawal perlindungan paten di Malaysia. Pemohon boleh mengemukakan permohonan paten secara langsung jika dia berdomisil atau bermastautin di Malaysia. Permohonan asing hanya boleh dikemukakan melalui ejen paten berdaftar di Malaysia yang bertindak bagi pihak pemohon.

Seperti perundangan-perundangan di negara-negara lain, sesuatu reka cipta boleh dipatenkan sekiranya ia baru, melibatkan satu langkah penciptaan dan mempunyai aplikasi perindustrian. Selaras dengan TRIPS, Akta Paten menetapkan tempoh perlindungan selama 20 tahun daripada tarikh mengemukakan permohonan. Di bawah Akta ini, sijil inovasi utiliti memperuntukkan perlindungan tempoh awal selama sepuluh tahun dari tarikh mengemukakan permohonan dan boleh diperbaharui untuk dua tempoh berturut-turut selama lima tahun setiap tempoh, tertakluk pada kegunaan. Pemilik sesuatu paten berhak mengeksploitasi reka cipta yang dipatenkan, menyerahkan hak atau memindah milik paten, dan mengikat kontrak berlesen. Walau bagaimanapun, termasuk juga pengecualian paten seperti lesen wajib dan barangan import selari.

1.2 Cap Dagangan

Perlindungan cap dagangan dikawal oleh Akta Cap Dagangan 1976 dan Peraturan-Peraturan Cap Dagangan 1997.

Akta ini menyediakan perlindungan bagi cap dagangan dan cap perkhidmatan yang berdaftar di Malaysia. Apabila berdaftar, tiada sesiapa pun atau syarikat selain empunya atau pengguna-pengguna dibenarkan menggunakannya. Tindakan undang-undang boleh diambil terhadap mereka yang menggunakannya tanpa kebenaran. Tempoh perlindungan adalah selama sepuluh tahun, dan boleh diperbaharui untuk tempoh selama setiap sepuluh tahun selepas itu. Tuan punya cap dagangan atau cap perkhidmatan berhak mengurus niaga atau menyerahkan hak serta melesenkan penggunaannya.

Sama seperti paten, walaupun pemohon tempatan boleh mengemukakan permohonan mereka sendiri, pemohon asing hendaklah mengemukakannya melalui ejen cap dagangan berdaftar.

1.3 Reka Bentuk Perindustrian

Perlindungan reka bentuk perindustrian di Malaysia ditadbir di bawah Akta Reka Bentuk Perindustrian 1996 dan Peraturan-Peraturan Reka Bentuk Perindustrian 1999. Akta ini memperuntukkan bahawa hak-hak reka bentuk perindustrian berdaftar merupakan harta persendirian dan boleh diserahkan dan dipindah milik melalui kuat kuasa undang-undang.

Untuk layak didaftarkan, reka bentuk perindustrian mestilah baru dan tidak merangkumi kaedah pembinaan atau reka bentuk yang ditentukan semata-mata oleh fungsi. Di samping itu, reka bentuk barang itu mestilah tidak bergantung pada rupa suatu barang lain yang menjadi suatu bahagian yang perlu dalam barang lain itu.

Pemohon tempatan boleh mengemukakan pendaftaran dengan sendiri atau melalui ejen reka bentuk perindustrian berdaftar. Walau bagaimanapun, pemohon asing perlu mendapatkan perkhidmatan ejen reka bentuk perindustrian berdaftar. Reka bentuk perindustrian berdaftar dilindungi selama tempoh awal lima tahun yang mana boleh dilanjutkan selama 4 lagi tempoh berturut-turut selama 5 tahun setiap kali, menyediakan jumlah tempoh perlindungan selama 25 tahun.

Malaysia telah meminda Akta Reka Bentuk Perindustrian 1996. Pindaan tersebut mula berkuat kuasa pada 1 Julai 2013. Pindaan itu termasuk kebaharuan seluruh dunia, peningkatan tempoh perlindungan, pengenalan Sistem Jurnal Harta Intelek dan peruntukan mengenai pengewangan dan kepentingan sekuriti reka bentuk perindustrian.

1.4 Hak Cipta

Akta Hakcipta 1987 memperuntukkan perlindungan yang komprehensif untuk karya yang mendapat hak cipta. Akta tersebut menggariskan jenis karya yang layak untuk mendapat hak cipta (termasuk perisian komputer), skop perlindungan, dan cara bagaimana perlindungan diberikan. Hak cipta wujud dalam setiap karya yang layak mendapat perlindungan hak cipta yang penciptanya merupakan orang berkekeluargaan.

Perlindungan hak cipta untuk karya sastera, muzik atau seni adalah untuk jangka masa hayat pencipta dan tempoh 50 tahun selepas kematiannya. Berkenaan dengan rakaman bunyi, siaran dan filem, perlindungan hak cipta adalah selama 50 tahun selepas karya itu mula-mula diterbitkan atau dibuat.

Akta ini juga menyediakan perlindungan kepada hak pelaku dalam persembahan langsung yang akan terus wujud selama 50 tahun dari permulaan tahun kalendar berikutan tahun persembahan langsung itu diadakan atau ditetapkan dalam suatu rakaman bunyi.

Suatu ciri unik Akta ini merupakan peruntukan bagi penguatkuasaannya. Pindaan Akta Hak Cipta 1987, yang dikuatkuasakan pada 1 Oktober 2003, memberikan kuasa menangkap (termasuk menangkap tanpa waran) kepada pegawai penguat kuasa Kementerian Perdagangan Dalam Negeri dan Hal Ehwal Pengguna (KPDNHEP). Pasukan pegawai khas KPDNHEP ini dilantik untuk menguatkuasakan Akta tersebut dan diberi kuasa untuk memasuki premis yang disyaki mempunyai salinan langgaran dan mencari serta menyita salinan langgaran dan perekaan.

Akta Hak Cipta (Pindaan) 2012 mula berkuat kuasa pada 1 Mac 2012. Akta itu dipinda agar selaras dengan perkembangan teknologi dan untuk mematuhi konvensyen/triti harta intelek antarabangsa berhubung dengan hak cipta dan hak-hak yang berkaitan. Antara pindaan utama ialah pengenalan sistem pemberitahuan sukarela hak cipta, pengawalseliaan badan pengurusan kolektif (CMO) dan pengembangan fungsi Tribunal Hak Cipta. Bermula dari 1 Jun 2012, pemilik hak cipta boleh memohon pemberitahuan sukarela di Harta Intelek Malaysia (MyIPO) dan CMO boleh didaftarkan di MyIPO.

1.5 Reka Bentuk Susun Atur Litar Bersepadu

Akta Reka Bentuk Susun Atur Litar Bersepadu 2000 memberikan perlindungan bagi reka bentuk susun atur litar bersepadu berdasarkan keaslian, hasil usaha intelek penciptanya sendiri dan hakikat bahawa reka bentuk itu dicipta secara bebas. Tiada pendaftaran bagi reka bentuk susun atur litar bersepadu.

Tempoh perlindungan adalah selama 10 tahun dari tarikh eksploitasi komersial, atau 15 tahun dari tarikh penciptaan sekiranya tidak dieksploitasi secara komersial. Akta ini juga membenarkan tindakan diambil oleh pemilik sekiranya hak sedemikian yang diiktiraf di Akta ini dilanggar. Hak ini boleh dipindah milik sama ada sebahagian daripadanya atau keseluruhannya secara penyerahan hak, pelesenan, wasiat atau melalui penguatkuasaan undang-undang.

Akta ini dilaksanakan mengikut Perjanjian TRIPS untuk memberikan jaminan kepada para pelabur dalam industri barangan elektronik Malaysia dan untuk memastikan pertumbuhan teknologi di negara ini.

1.6 Petunjuk Geografi

Akta Petunjuk Geografi 2000 memberikan perlindungan kepada barangan mengikut nama tempat barangan itu dikeluarkan, jika kualiti, reputasi atau ciri lain tertentu barangan itu adalah pada dasarnya boleh dianggap berpunca dari tempat asal geografinya. Perlindungan ini terpakai untuk barangan seperti keluaran semula jadi atau pertanian atau apa-apa keluaran kraf tangan atau industri. Petunjuk geografi yang bertentangan dengan ketenteraman awam atau prinsip moral tidak dilindungi di bawah Akta.

Pemohon tempatan boleh memfailkan pendaftaran dengan sendiri atau melalui ejen petunjuk geografi berdaftar. Walau bagaimanapun, pemohon asing perlu mendapatkan perkhidmatan ejen petunjuk geografi berdaftar. Tempoh perlindungan adalah selama sepuluh tahun, dan boleh diperbaharui untuk tempoh selama setiap sepuluh tahun selepas itu.

MyIPO juga menyediakan perkhidmatan carian dan pemfailan dalam talian untuk paten, tanda dagangan, reka bentuk perindustrian dan petunjuk geografi; dan carian dalam talian untuk pemberitahuan karya yang mendapat hak cipta. Untuk maklumat lanjut mengenai perlindungan harta intelek, sila lawati www.myipo.gov.my.

1.7 Penilaian Harta Intelek

Selaras dengan Model Penilaian Harta Intelek, suatu program Latihan Penilaian Harta Intelek telah diwujudkan dengan kerjasama Institut Perdagangan Dunia (WTI), Universiti Berne, Switzerland, dan dilancarkan pada 7 Mac 2013 dengan latihan kumpulan perintis. Ketersediaan penilai harta intelek (IP) tempatan akan membantu mengurangkan kos dan kerumitan pelantikan penilai IP asing dalam menyediakan penilaian bagi tujuan pembiayaan dan peminjaman, dan dengan itu menjadikannya lebih mudah dicapai oleh perusahaan kecil dan sederhana (PKS) serta pemilik IP dalam mendapatkan penilaian IP mereka. Perkara ini seterusnya akan menyumbang kepada peningkatan keseluruhan ekosistem.

1.8 Pembiayaan IP

Sebagai sebahagian daripada strategi keseluruhan Kerajaan untuk menambah baik dan meningkatkan daya saing PKS tempatan, MyIPO telah bekerjasama dengan pelbagai pihak berkepentingan dan pemain utama dalam industri terutamanya para peminjam dan institusi kewangan untuk mengembangkan produk kewangan dan pinjaman mereka dengan menyediakan pembiayaan berdasarkan hak IP PKS sebagai sebahagian daripada cagaran yang diperlukan untuk menjamin pinjaman oleh PKS.

1.9 Pasaran Hak IP

Sebagai sebahagian daripada teras keseluruhan dalam mengukuhkan Ekosistem IP, usaha memastikan permintaan dan penawaran IP yang baik adalah amat penting untuk menggalakkan pelaburan yang berterusan dalam penciptaan IP dan bentuk pengetahuan dan aset tidak ketara yang lain. MyIPO telah membangunkan dan melancarkan platform perintis yang dipanggil Pasaran Hak IP untuk meningkatkan akses dan kemudahan bagi pemilik IP yang ingin melesenkan dan menjual hak-hak mereka. Portal ini diwujudkan untuk mengatasi kesulitan yang dihadapi oleh pemilik IP dalam usaha untuk memperkenalkan IP mereka dan mendapatkan akses kepada pemegang lesen dan pembeli yang berpotensi. Dengan platform ini, MyIPO telah mengadakan perkongsian strategik dengan pasaran IP lain di Hong Kong, Singapura dan beberapa wilayah di China untuk mengembangkan jangkauan hak-hak IP tempatan. Pasaran yang lebih sesuai di seluruh dunia akan ditambah kepada rangkaian tidak lama lagi.

Untuk mengetahui dengan lebih lanjut mengenai pasaran IP dan cara anda boleh menyertainya, sila lawati www.iprmarketplace.com.my.